

Scolaziun pastorala renovada

Studis teologics en Estonia e Lettonia

DA GUIU SOBIELA-CAANITZ

■ **La Quotidiana dals 14 da schaner ha rapportà ch'il Cussegl episcopal da Cuira haja decidì «da sistir cugl onn da studi 2000/2001 ton la Scuola alta teologica sco il Seminari da spirituals en sia fuorma actuala», e quai tanter auter pervi dal «mudest diember da students».** Dentant, a 1500 km da nus en lingia d'aria, promovon scolas autas a Riga (Lettonia), Tallinn e Tartu (tudestg Reval e Dorpat, Estonia) studis pastorals basads sin la tradiziun evangelica luterana (Confessiun d'Augsburg da 1530), però en in spiert adina pli ecumenic. La revista svizra «Glaube in der 2. Welt» ha gist deditgà dus essais detagliads* a quel svilup dapi ch'ils pievels pertutgads han sa liberads da l'oppressiun russa comunista.

Spiert avert en l'Estonia

Retg Gustav Adolf da Svezia ha fundà l'Academia gustaviana, pli tard Università da Tartu (UT), gist avant sia mort en la battaglia da Lützen 1632. 1941 ha la pussanza sovietica «aboli la Facultad teologica (FTT) da l'UT, stgatschà, exilià u mazzà ses professers, manizzà ed ars ils blers cudeschs

da sia biblioteca». La Baselia evangelica estona (BEE) ha fundà 1949/50 l'Institut teologic (IT) da Tallinn: «Ils funcziunaris ateists dal stadi han lubì lezza creaziun per controllar tut quai che succedeva en la baselia e las plaivs (...). Ins na pudeva ordinar in spiritual senza ch'el fiss stà scolà da la BEE e senza l'accord dal stadi». Suentar la liberaziun e la renaschientscha da l'Estonia independenta 1991 ha in teolog finlandais renovà l'IT, «introducend il rom pedagogia religiusa e la scolaziun dals diacons (...). Il diaconat eston vala sco l'emprim stgalim da la funcziun spirituala (...). Il diacon ordinà po era studegiar enavant, cuntanscher il diplom da l'IT e vegnir ordinà plevon en uffizi cumplain». Da l'autra vart han ins restabili la FTT «sco lieu da furmaziun teologica protestanta» (p.17), dentant per amaduas schlattainas e sur las confessiuns, pia per luterans, refurmads e commembers d'autras baselgias evangelicas; la FTT renovada cumpiglia er in institut da pedagogia religiusa. «Tgi che studegia a l'IT frequenta gia la FTT per ina part da sia scolaziun (linguatgs vegls) (...). Tgi che ha absolt l'IT po studegiar enavant a la FTT» (p. 20). Quai resulta dal «patg da cooperaziun

segnà festivamain ils 29 da mars 1999 tranter l'UT, la BEE e ses IT» (p. 16). L'Estonia ha sa laschada inspirar da la Finlanda, auter pajais da tradiziun luterana, che discurra in linguatg fitg sumegliant.

Ils cuntrasts da Lettonia

La Lettonia perencunter è linguistica-main isolada; sia sora da tschantscha, la Lituania, è catolica, dano en la sdrima sidvest, part da la Prussia da l'ost enfin 1945. Catolic è er il chantun sidost da Lettonia, sper il cunfin bielorus, cun ina baselia renunada da pelegrinadi ad Aglona, visitada 1993 dal papa. L'Uniu sovietica ha plinavant promovì l'immigraziun russa en Lettonia (oz 32% Russ) pli ch'en Estonia (28%). La Facultad teologica (FTL), restabilida 1990 a l'Università da Lettonia a Riga, vegn descritta aschia da decan Vilis Varsbergs: «Ella vul dar ina buna scolaziun teologica a tgi che la giavischa (...); ella pussibilitescha da studegiar e d'emprender a servir als conumans (...). Glied fitg differenta tras tempra ed interess studegia a la FTL. Quai n'è betg ina flaiveltezza, mabain ina forza. I ha sa verifitgà ch'ìls

megliers teologs èn quels carstgauns che han sa sviluppads en la cuntra-versa cun posiziuns da tutta sort ed èn vegnids da las discutir en spiert critic ed objectiv» (p. 23). Il parlament letton ha dal reminent cumprovà sia avertadad ils 17 da zercladur 1999, elegend la psicologa e linguista Vaira Vike-Freiberga a la presidenza da la republica. Il tgau dal stadi è pia ina dunna. Ella na pudess però vegnir preditganta da la Baselia evangelica lettona (BEL); lezza ordinescha be umens. Ses manader, archuvestg Janis Vanags: «Per tgi che vul vegnir plevon luteran datti be ina via clera da scolaziun, numnadamain l'Academia Luther da la BEL». Lezza scola auta è naschida 1997 a Riga e «porscha in studi teologic plain» (p. 24). Averta resta la dumonda da sia cooperaziun cun la FTL. Tant questa en Lettonia sco era l'IT e l'UT en l'Estonia derasan dentant in spiert ecumenic al cunfin d'ina Russia nua ch'in tal fa propi basegn.

* Paul-Gerhard Hoerschelmann, **Theologische Fakultät und Theologisches Institut; Heinrich Wittram, Theologenausbildung in Lettland**, en: **Glaube in der 2. Welt 2000/1, Zollikon/ZH, pp. 16-24. Adressa: Bergstraße 6, Postfach 9, 8702 Zollikon. Telefon 01 391 37 47 u 48. Telefax 01 391 44 26. Posta electronica: g2w@swissonline.ch.**